


FASNACHTSGESELLSCHAFT



BASEL ALTI GARDE GEGR. 1995

Fasnacht 2017

Exit for Brexit – Tea for One

Jetz wänn die Brite also wirgglig goo
Und ändgiltig dr EU dr Rugge keere
Aaber in Europa isch me doo driiber froo
Und duet drum dä Ustritt kuum verweere.
As Grossbritannien anderscht tigg
Das wais me aigedig scho lang
Denn d Bryte sin halt bsunders gstriggt
Und zien doorum nit am EU-Strang
So dien si allewyl no in *Yard* und *Meile* mässe
Und suffe s Bier us *Pints* und ooni Schuum
Als kulinarisch Highlight dien si *Porridge* frässe
Und zwoor im e gsteilte *Dinning-Room*
Zum Zmorge *Black-Pudding* und *Backed-Beans*
Mit faisse Wirscht und ditto Spägg
S Gmies isst me-n us em Wasser zooge
Und zwischeduure gits e *Pie* als *Snack*.
Punggt Vieri wird dr Milchtee gnosse
Derzue gits *Scons* mit Confitüre
Me duets duur e *Butler* denn serviere losse
Das sin scho bsunderi Allüre.
Au faart me-n in Ängland uf dr lingge Syte
Und goot nie ooni Schirm zur Hütte-n uus.
In *Ascot* zaige sich d Fraue vo de Bryte
Mit groosse Hiet uus rychem Huus.
Me spiilt *Cricket* an de Wuchenändi
E Spiil, wo me numme ummestoot
Wo Stunde duurt bis zur finale Wändi
Und das zue Reegle, wo e kain verstoot.
Im *Old Bailey* dien si Perügge draage
Und singe zerscht als no *God save the Queen*
Im *House of Lords* dien d *Earls* als daage
In lange Roobe - die hän e Spleen.
As Zytig duet me d *Times* als lääse
Denn d *Sun* gilt als dekadänt und dumm
Und d *BBC* isch fir e brytisch Wääse
Dr ainzig Sänder im Imperium.
Me pfläggt no allewyl dä Grossmachtsspleen
Und läbbt in Gedangge in dr Vergangehait
Und iiber allem droont die alti *Queen*
As änglisch Sinnbild vo dr Eewigkait.
Die hoggt syt Joorzäänte in däm *Buckingham*
Und draimt säälilig deert vo alte Zyte
Wo iir Imperium no mit vyyl Tam-Tam
E Wältmacht gsi isch fir die Bryte.

No immer duet me s *Rule Britannia* singe
Und druurt de-n alte Zyte noo
Me glaubt d Zuekunft wurd d Wändi bringe
Und ooni EU wurd s au goo.
So stimmt die ganzi *British Nation*
Mit ere Mehrhait fir dä EU-Exit
Und fir e *Splendid Isolation*
Ganz ooni Brüssel und fir e Brexit.
Me duet d Verbindige zer EU kappe
Denn mit Europa mecht me nimm kutschiere
Ab sofort spaart me jede Rappe
Und kaa ändlig wiider elai regiere.
So wird d EU-Mitgliedschaft begrabe
Und me goot jetz syni aigne Wääg
Me het gnueg vo dämm EU-Gehabe
Elai fyyt me sich besser zwääg.
Zwor waiss niemerts, wo das duet anefiere
Abschotte isch zwor guet und rächt
Doch d EU wird Ängland degradiere
Und das isch au fir d Bryte schlächt.
Numme die, wo ganz im Norde wohne
Dien jetze iiri Mässer wetze
Denn fir d Schotte duet sich d EU loone
Drum dien sy geege Ängland hetze.
Die dert oobe in de Schotte-Regg
Wänn nämmelig bi dr EU blybye
Si bloose uff iire Duudelsegg
Und d EU duet Subvenzioone ryybe.
So losst me s *Scotland the Brave* erklinge
Und hofft uf d Unabhängigkait
Wo me vo Ängland mecht erzwingen
E frei Schottland wär d Glücksääligkait.
Dr *Hadrian Wall* wurd so wiider d Gränze
Fir Ängland en umkeerts *Waterloo*
Und d Brite wärde sich zum Troscht gredänze:
E *Tea for One* statt *Tea for Two!*

D Frau Fasnacht laadet y an d Ladärneusstellig
uff em Minschterplatz und an d Usstellig vo de
Wääge und Reggwisyte uff em Kasärneplatz
Vom Mäntigzoobe bis am Mittwuchmoorge.

www.muggedaetscher.ch